



Betg dal medem avis pertutgant il princip territorial: Entant che cusseglier guvernativ Claudio Lardi (san.) cumbatta l'idea dal princip territorial vesa Jost Falett en la garanzia da la territorialità sco unica schanza per salvar il rumantsch en territoris periclitads. LQ

Resultats èn embrugliants

La dumonda da linguatg ha chaschunà malsegirezza

DA MARTIN CABALZAR

■ **La dumonda davart la lingua ha chaschunà embarass tar blers Rumantschs. Il linguatg discurre regularmain en famiglia n'è betg identic cun il linguatg principal en il mund professiunal. Ed il dumber da tals che chapischan rumantsch è anc ina giada blier pli aut. Malgrà quai è l'erosiun dal rumantsch marcanta e fa quitads als respunsabels.** Gia en la dumbraziun da l'onn 1990 han ins già constatà che mo 39 632 personas han già inditgà il rumantsch sco linguatg principal, dentant 55 707 sco linguatg pledà dal pli frequent en famiglia. Diesch onns pli tard han radund 10 000 personas pli pauc inditgà il rumantsch sco linguatg principal, las cifras dal linguatg discurre en famiglia e professiun cumparan pir questa stad. Quai maina a la conclusiun che il rumantsch è pli derasà sco linguatg discurre che sco linguatg principal. Quai aveva *Gion Giachen Furer* constatà gia en la LQ dals 17-1-1997.

Rrestrenscher autonomia communal

Er sche ils resultats definitivs èn anc betg avant maun è la situaziun alarmanta. Admis che ils Rumantschs sezs sajan persuadids da mantegnair lur lingua stoppian ins prender differentas mesiras urgentas sin champ legal (constituiziun chantunala e lescha federala da linguatgs) e finanziar per promover il linguatg, punctuescha la LR en sia puziun. «En tsherts cas vegni ad esser indispensabel da restrenscher l'autonomia communal per garantir ch'il rumantsch possa survivor», accentuescha il parsura *Jost Falett*. La situaziun actuala lubeschia che ina vischnanca po decider spontaneamente ed independentamain la lingua. Plinavant stoppi il regulativ da linguas che è en vigur en las regiuns d'origin rumantsch era vegnir applitgà per territoris bilings. «En ina nova offensiva doveri era novas finanzas per savair realisar ideas e projects che èn gia avant maun, saja quai per l'animaziun culturala e per la lavur bilingua.» Ina midada dal curs actual na saja ni necessaria ni opportuna.

Lardi quinta cun Berna

Il minister da cultura *Claudio Lardi* n'ha betg vuli commentar ils resultats provisoris. Lardi punctuescha dentant che confederaziun e chantun prestian gia oz in engaschament finanziar considerabel da radund quatter milliuns francs a favur dal rumantsch. Sin champ da scola haja ins introduci la matura bilingua, promovì la scola bilingua en lieus germanisads e resguardà il rumantsch sco alternativa al talian e franzos en il concept da linguatg. Ils meds d'instrucziun en tshintg idioms absorbeschian meds considerabels. Ulteriurs meds finanziars per la promoziun da lingua metta il chantun a disposiziun a la LR che è er cumpetenta d'applitgar quests meds tenor atgnas prioritads. Nagina simpatia ha Lardi per in princip territorial decretà dal chantun. El saja persuadì ch'ins na possa betg salvar il rumantsch cun squitsch statal. Grondas speranzas metta Lardi dentant sin la nova lescha da linguatgs che preveda in sustegn supplementar a chantuns bilings e trilings.